



Protocol dalla radunonza generala dil chor Surselva ils 12 da schaner 2024 allas 19.30 uras el Hotel Eden a Glion

Tractandas

1. Beinvegni
2. Approbaziun dalla gliesta da tractandas ed elecziun da dus dumbravuschs
3. Protocol dalla radunonza generala dils 10-12-2021
(il protocol ei d'anflar sin nossa pagina, intern informaziuns commembers)
4. Rapport dalla presidenta
5. Rapport dil dirigent
6. Rendaquen 2022/2023, rapport dallas revisuras ed approbaziun dil quen
7. Mutaziuns
8. Elecziuns:
 - president/ presidenta
 - cassier/ cassiera
 - actuar/actuara
 - assessur/assessura
 - revisurs/ revisuras
 - dirigent
9. Orientaziun project 2024
10. Contribuziun annuala
11. Varia

1. **Beinvegni:** La presidenta Renata Gienal beneventa ils commembers da tschep ed ils participonts al project «Stiva da filar».
2. **Tractandas:** La gliesta da tractandas vegn approvada unanimamein. Sco dumbravuschs vegn Ursula Kobler elegida. Il pli absolut ei . 10 Perstgisai ein: Maria Venzin, Jolanda Venzin, Augustin Beeli Ervin Gienal, Franziska Grünenfelder, Heini Hunger, Kobler Andrea, Annaleta Vincenz
3. **Protocol:** Il protocol dalla radunonza dils 10-12-2021 vegn approbaus cun 2 remarcas: igl onn 2021 manca el tetel ed il num «Vincenz» ei screts falliu. Il protocol hodiern vegn screts da Vreni Caprez damami che l'actuara Maria ei malsauna.
4. **Rapport dalla presidenta:** Cun scriver il rapport ha la presidenta realisau ch'il davos rapport dil CS schai gia treis onns anavos, quei perquei ch'igl ei marschau nuot ils onns da Corona e suenter. Tenor statutas eis ei da dar giu rapport suenter in onn cun

activitads ni suenter in project. Igl emprem project instradaus dil dirigent e dalla gruppa da project ei vegnius satraus avon ch'entscheiver per munconza d'interess dils cantadurs. L'idea dalla «Stiva da filar» ha denton in onn pli tard svegliau marveglias e carmalau ils cantadurs en roschas. Grazia all'activitad dalla meina-project Marlies ha la gruppa da lavur beinspert saviu prender a mauns las lavurs organisatoricas ed il project ei gartegiaus oreifer. La collavuraziun cul museum ei stada fetg emperneivla, ils sponsurs beinvulents ed ils cantadurs e las cantaduras fetg motivai d'emprender las bialas canzuns popularas en cuort temps. Alla fin dil project ha ei dau per tuts ina stupenta tscheina en la Casa Casutt. Alla fiera da Daniev a Cumbel han entgins commembers fatg reclama per il proxim project e recaltgau zatgei daners cun vender products indigens dalla Marlies. In sincer grazia fetg a tut quels ch'ein segidai! Deplorablamein havein nus stuiu prender cumiau da nossa commembra Christina Bischof e da nies concanadur e commember da project Reto Schnoz ch'ein morts igl onn vargau. Ina delegaziun dil CS ha dau honor ad els cun entginas canzuns. Nus seregurdein dad els cun in silenzi. Cun quei siara la presidenta siu rapport.

5. Rapport dil dirigent: Il dirigent Rest raquenta libramein: Suenter il temps da Corona cu tut era scumandau, cunzun il cantar, e nus havein stuiu sistir il project dalla messa latina cuort avon la presentaziun era ei fetg grev d'anflar la motivaziun per novas caussas. Grazia als impuls dalla presidenta e da sia dunna Petra ed era da damondas d'ordeifer «tgei eisi cul chor Surselva?» hagi el la finala puspei giu motivaziun ed ideas. En emprema lingia duess ei ussa suenter quella liunga pausa ir per svegliar daniev il plascher da cantar, buca gronds projects mobein cantar da cor. L'idea da cantar el museum regional a Glion era gia pli baul avonmaun e cun prender si contact cun las personas responsablas vegnida pli concreta damai che quels eran immediat persuerter da porscher maun. La finala ein ils dus concerts reussi oreifer schibein ord vesta da dirigent, musicists, cantadurs ed auditurs. Quels ein vegni en roschas ed han engraziiau cun grond applaus e plaids beinvulents. Rest engrazia el num da tuts presents alla Renata ed alla Marlies per la gronda lavur el tschelau.

6. Rendaquen: Giuliana ha fatg la contabilitat dils davos onns. Ella sa mussar ora entradas da 21'895.-frs ed expensas da 21'184.- frs, pia in gudogn da 710.- frs.

Il capital agen munta a 45'184.- frs

Las revisuras Manuela e Rita han controllau ed anflau per bien la contabilitat e recamondan da dar scarica alla Giuliana ed alla suprastonza. Il quen vegn approbaus cun applaus.

7. Mutaziuns:La presidenta ha survegniu 3 brevs dad extradadas: Andrea Kobler, Heini Hunger ed Ervin Gienal engrazian tuts treis per il bien temps el CS e giavischan a quel tut bien pigl avegnir.

8. Elecziuns: tenor statutas eis ei mintga dus onns da menar atras elecziuns dalla suprastonza. Maria Venzin ha demissionau ord motivs da sanadad sco vice-presidenta

ed actuara e sto vegnir remplazzada. Pil post da cassiera ha la suprastanza anflau ina sligiazion enaquella che Marlies Vincenz surpren sper siu post da meina-project era la cassiera, sche Giuliana ei vinavon prompta da serrar giu il quen final. In' ulteriura demissiun ha la Manuela Deplazzes sco revisura inoltrau. En siu post vegn Petra Cavelti elegida. Il rest dalla suprastanza propona la presidenta dad eleger en globo.

Presidenta: Renata Gienal

Vice-presidenta ed actuara: Vreni Caprez

Cassiera: Marlies Vincenz

Assessur: Manuel Lombriser

Senza cuntervuschs vegn suandau a quella proposta e la suprastanza ei puspei cumpletta.

Tenor statutas sto era il dirigent vegnir elegius mintga dus onns. Per munconza da cuntercandidats vegn era Rest elegius unanimamein.

La presidenta engrazia all'absenta Maria Venzin per siu liung engaschi a favur dil CS e vegn a surdar ad ella persunalmein in regal.

In grond engraziament va era a Marlies cun ina laudatio impressiunonta ed in regal. Medemamein a Rest engrazia Renata per siu engaschi musical cun ina buna butteglia vin.

9. Orientaziun project 2024: Sco gia publicau a caschun dil concert ei previu da cantar la messa da credo KV 257 da Mozart. Il plan d'emprovas vegn publicaus sin la pagina d'internet. Las duas emprovas da fuffergnadi han liug ils 25-2-24 ed ils 8-3-24, silsunter ein previdas 20 emprovas naven da fin d'uost 2024. Ils concerts ein previ per ils 14/15 da december 2024. Quei tut dependa naturalmein da cantaduras e cantadurs, mauncan quels sa il niev project buc vegnir realisau. Cunzun las vuschs virilas fan in tec quittaus. Mintgin duess perquei animar cantaduras e cantadurs da far part da quei grondius project. Ina proposta ei da colaborar cun in auter chor!

10. Contribuziun annuala: La suprastanza propona da schar quella sin 50.- frs sco tochen dacheu. Negin ei encunter!

11. Varia: A caschun da nies concert »Stiva da filar« havein giu fetg bia visitaders, perquei appelescha la presidenta als presents dad era visitar concerts dad auter chors.

La radunonza cantunala, che ha uonn liug en l'Engiadina ei mintgamai era ina scuntrada da cantdurs dallas regiuns e savens interessanta: in giavisch dall'unien tetgala fuss ch'ei vegness puspei cantau dapli en scola e che cant e musica havessen dapli preschientscha en la pressa, semegliant al sport!

Il 15-6-24 ha liug la fiasta districtuala dalla Surselva a Trun. Il CS fa buca part, denton:
Mei e tedlei!

Ed ussa bien appetit a tuts!

Fin dalla radunonza allas 21.00 uras

Trin, 14-01-2024

L'actuara dil gi: Vreni Caprez

La presidenta: Renata Gienal